

# INUIT ATAQATIGIIT

## INATSISARTUNI



Nuuk, 19. marts 2014

Inatsisartut Suleriaasianni § 37 naapertorlugu Naalakkersuisunut imaattunik apeqquteqar-punga.

(Inatsisartunut ilaasortaqaq Sara Olsvig, Inuit Ataqatigiit)

### Apeqqutit:

- 1. Kalaallit Nunaanni puisinniarneq pillugu Folketingip Kalaallit Nunaannut ataatsimiititaliaata tusarniaatitsinerani inassuteqaatit saqqummiunneqartut, matumani immikkut eqqarsaatigalugu Kalaallit Nunaanni puisinniarnerup piujuaannartitsineq tunngavigalugu ingerlanneqarnerata aammalu puisit amiisa kalaallit tunisassiaasa tunngavissaqartuunerannik ilisimasaqarnerup EU-mi nunarsuullu sinnerani siammarterneqarnissaanut atattillugu annertuumik paasissutissiinissamik qaammarsaanissamillu ingerlataqartussamik suleqatigiissitaliortoqarnissaanik inassuteqaat, Naalakkersuisut qanoq malitseqartinniarpaat?**
- 2. Taamatut suleqatigiissitanik Naalakkersuisut pilersitsissappata taava suleqatigiissitat soqutigisalinnit assigiinngitsunit, soorlu danskit naalakkersuisunit, Naalakkersuisunit, Great Greenlandimit, Kopenhagen Furimit, KNAPK-mit allanillu ilaasortaaffigineqarnissaat Naalakkersuisut qularnaarniarlugulu ataqatigiissaarinerup isumagineqarnissaa Naalakkersuisut suliasamissut tiguniarpaat?**
- 3. Kalaallit Nunaannut ataatsimiititaliap tusarniaatitsinerani WWF aamma Greenpeace Kalaallit Nunaanni puisinniarnermut erseqqissumik tapersiipput. Kalaallit Nunaanni puisinniarnerup piujuaannartitsineq tunngavigalugu ingerlanneqarnerata aammalu puisit amiisa kalaallit tunisassiaasa tunngavissaqartuunerannik ilisimasaqarnerup siaruarterneqarnissaanut taakkua soqutigisaqatigiiffiit nunarsuaq tamakkerlugu inuppapassuarnit ilisimaneqartut qanoq ilapittuutaasinnaanerat pillugu Naalakkersuisut oqaloqatiginialersaarpaat?**
- 4. Suleqatigiissitanik pilersitsisoqassagaluarpaat aammalu sakkortusisamik paasissutissiinermik qaammarsaanermillu ingerlatsisoqalissagaluarpaat tamakkuva aningaasatigut tunngasortaasa Kalaallit Nunaannit, Danmarkimit aammalu EU-mit peqatigiilluni qanoq kivinneqarsinnaanera pillugu danskit naalakkersuisuinik EU-millu Naalakkersuisut oqaloqateqarnialersaarpaat?**
- 5. Puisit amiisa kalaallinit tunisassiarineqartartut atisanik ilusilersuisarfisuaranut aammalu atisanik nioqquteqartartunut nalinginnarmik, Europami atugassanik pisiniarfinnut, pilersaarutigineqarnissaat aammalu Kalaallit Nunaanni puisinniarnerup piujuaannartitsineq tunngavigalugu ingerlanneqarnerata puisillu amiisa tunngavissaqartuunerat pillugu nunat tamat akornanni ilisimasaqarnerup qanoq qaffassarneqarsinnaanera pillugu iliuusissatut pilersaarummik erseqqissumik Naalakkersuisut saqqummiusiniarpaat?**

## **Tunngavilersuut:**

Kalaallit Nunaanni puisinniarneq pillugu Folketingip Kalaallit Nunaannut ataatsimiititaliaa martsip 13-iani qinikkat tusarniaatitsinerannik ingerlatsivoq. Tusarniaanermut ilaatigut ilaapput KNAPK, Naalakkersuisut, danskit naalakkersuisui, WWF, Greenpeace, Dyrenes Beskyttelse aammalu Pinngortitaleriffik. Tusarniaanermi malunnarpoq Kalaallit Nunaanni puisinniarneq nalinginnaasumik erseqqissumik tapersorsorneqartoq siunissarlu isigalugu tamanna qanoq sulissutigineqarsinnaanersoq pillugu isumassarsianik amerlasuunik saqqummiussuisoqarluni.

Kalaallit Nunaanni puisinniarnerup piujuaannartitsineq tunngavigalugu ingerlanneqarnerata aammalu puisit amiisa kalaallit tunisassiaasa tunngavissaqartuunerannik ilisimasaqarnerup siammarterneqarnissaanut aningaasatigut suliassartaata kivitseqataaffigineqarsinnaanissaanut danskit naalakkersuisuisa aammalu danskit folketingimi ilaasortaasut kaju-minnertik ilaatigut oqariartuutigivaat.

Tamatuma saniatigut qaammarsaanermut tamatumunnga EU-p tungaanit tapiisoqarsinnaaneranut periarfissanik misissuinissamut danskit naalakkersuisuisa aamma kajuminertik oqariartuutigivaat.

Aamma soqutigisaqaqatigiiffiit angisuut marluk WWF aamma Greenpeace kalaallit puisinniarnerannut piujuaannartitsinerlu tunngavigalugu puisit amiinik tunisassiornermut erseqqissumik tapersiipput.

Taamaammat kalaallit maannakkut qisuariartariaqarput. Tamanna pillugu tusarniaanermi peqataasut assigiinngitsut ajunngisaarnerminnik oqariartuuteqarnerat tigussaasumik malitseqartinneqaqqullugu Naalakkersuisut maanna sukkasuumik sulisariaqalerput.

Apeqqutit ullut suliffiusut qulit qaangiutsinnagit akineqareersimanissaat kissaatiginarpoq.